



Aqqalu C. Jerimiassen

Atassut

UPA 2023/8

25. april 2023

Inatsisartut ilassutitut aningaasaliissutitut inatsisissaannut siunnersuut 2022.

(Aningaasaqarnermut Naligiissitaanermullu Naalakkersuisoq)

Ukiut tamarluinnaasa ilassutissatut aningaasaliissutitut inatsisartutni sammiuartarput, 2021-imilu ilassutissatut aningaasaliissutaasimasut kingumut qivialaaraanni, malungineqarsinnaavoq 2022-imi qujanartumik kiisamiuna taama annertutigisumik pisoqarsimanngitsoq.

Tassuunakkullu aallarniutitut naalakkersuisut aningaasaqarnermullu ataatsimiitsitaliaq nersualaaqqaarumavakka.

Ukiulli tamarluinnaasa taamarsuaq nussuisarnitsinni, ila eqqarsaatigisinnaasariaqarparput, suummitaavaakua ukiut tamarluinnaasa nikeriaateqarnerpaasartut?

Tassuunakkullu nalimmassaaneruinnaanerit ukiunut tulliuuttunut, aningaasaqarnikkut inatsisissamik suliaqartarnermi tappiffigisinnaaneruarparput.

Taamaattorli paasisinnaavarputtaaq, piffiit maanna nalorninartorsiorfiusut nalaanni inuungatta. Tassalu nunarsuup ilaani sorsuttoqarnera tamatta ulluinnatsinnut sunniuteqaqimmat.

Aningaasap naleerukkiartornerata aqunniarnissaa nakkutiginiarnissaaluunniit aatsaat taamak nalorninartigisumiippoq, qanorlu sivisutigisumik tamassuma ingerlajumaarnissaattaq nalunarluni. Putin-ip Ruslandi-iata qanoq sulisutigisumik ingerlanissaa siulittoruminaammat.

Nunarsuarmilu maanna aningaasap naleerukkiartornerata ingerlariaasaattaq ukioq manna annertuumik unammillerneqarpoq.

Tassanilu peqqutaangaatsiarlunittaaq, nunarsuatta ilaani aningaasaqarnikkut suleqatigiiffik BRICS (Brazil, Russia, India, China, South Africa) G7-imik taaneqartartumut annertuumik unammillilermat, aningaasarsiornermullu allanikkajaajulluinnartumik ingerlariuseqarlutik nalilersuisarnerannut niuffannerup aningaasallu nalingata aqunneqarnerannut nalimmassaruminaatsitsigaatsialerlutik.

Ukraine-milu sorsunnerup malittaanittaaq tamanna minnerulersinngimmassuk, ukioq kingulleq aningaasartigut ilassutaasut nalimmassaasariaqarnermittaaq aallaveqarsimassasut naatsorsuutigiinnarsinnaavarput.

Kaammattuutigeqqissavarpulli, nalimmassaanissat qimerloorneqarilik.

Taamatut oqaaseqarluta Atassummiit siunnersuut tusaatissatut tiguarput.